

Tram ta transporta rond di 4 mil pasahero pa luna



ORANJESTAD:(AAN) Gabinete Mike Eman na inicio di su Gobernacion na 2009 – 2010, a cuminsa na prepara ehecucion di e plan pa no solamente renoba pero tambe revitalisa Centro di Oranjestad. Principalmente pa e di dos parti di e plan cu ta revitalisacion di Caya Grandi a inclui diferente elemento pa haci e area uno mas atractivo pa haci compras y eventualmente tambe pa biba. Un di e elementonan aki ta e streetcar of tram. E tram den e Plan di Renobacion mester a cumpli cu algun meta: Permeti e turistanan cu

ta bini cu barconan crucero cera conoci cu mas cu simplemente e waf of cercania. E tram ta transporta e turistanan via e museonan den cercania di Playa, te na final di Caya Grandi. Aki nan ta baha y por cana direccion pabou dunando nan oportunidad pa conoce y haci compras. Poco-poco ta mira cu ta yegando pa cumpli cu tur e metanan aki. Por a deduci esaki for di un declaracion duna door di Alex Henriquez, trail controller, kende ta traha diariamente riba e tram. E vehiculo aki ta core for di 10'or di mainta pa 1'or di merdia non-stop, for di dialuna pa diasabra. Na cada parada e ta tuma mas o menos 40 seconde pa e pasaheronan subi of baha y cada biahe ta dura mas o menos 15 minuut. Henriquez a splica cu e tram ta wordo bon uza, ya cu nan tin un average di 75 persona pa biahe diariamente. Siman pasa sinembargo nan a kibra record ora cu na algun ocasion a haya entre 80 y 85 persona pa cada biahe. Haciendo su calculonan, Henriquez ta bisa cu nan ta transporta rond di 4 mil persona pa luna. E por duna e informacion aki, ya cu pa cada biahe e ta yena

su logbook cu informacion di e personanan abordo. “Nos a nota cu nos ta haya bishita riba e tram di tur nacionalidad, hasta di Surnam y Antia,” el a remarca. Y e comentario cu generalmente nan ta ricibi ta masha positivo y nan kier sa tur loke ta e cambionan cu tin pendiente ainda pa Aruba. Mesora nan ta informa turistanan cu na final di Caya Grandi tin un Expo Hall di con Aruba tabata y kico ta e cambionan haci y loke cu falta ainda. E Trail Controller di e tram tabatin masha comentario positivo pa e barco Pullman Tour cu tur dialuna ta den haf. Riba e dia aki nan ta yena cu turistanan cu nan ta baha den caya y ta bolbe cu hopi



carga, di compranan haci. Di otro banda, loke a keda constata ta cu localnan tambe ta haci uzo di e tram, sea pa yega nan trabou, haci compras den caya of djis keiro y admira e ultimo desaroyonan den centro di Oranjestad. “Nan a cuminsa capta e idea

cu nan por bini cu e bus, coy e tram pa yega den caya y despues bay cas bek cu bus. Otronan ta laga nan auto di parkeerplaats y ta haci uzo di e tram pa bay haci compras den caya,” Henriquez a comenta.